


重印
續修
建水縣志

卷八之十二
未
十三

民國癸酉冬重印

續修建水縣志

王垂書署



續修建水縣志目錄

卷之十二 藝文二

包見捷

蒙自白謙渠碑記

王奎

雲龍山記

張佳允

臨安三洞記

郎瑛

顏洞記

黃衷

南明洞天記

雷耀龍

曲江新城碑記

黃明善

重修天王寺碑記

向僎

同年葉斗瞻修建祠堂落成記

倪蛻

王象山廣甯政蹟記

一笈子

雲節子唐神仙墓記

曾听

郡侯董公書院祠堂碑記

州侯陳公重修學宮記

鞏建豐

重修太和元氣坊碑記

王洪仁

寧邊樓碑記

陳肇奎

重修學宮記

王永義

重修學宮碑記

薛天培

重修禮門義路坊碑記

王善瑄

重修崇聖祠碑記

江濬源

重修廟大成殿告成記

傅爲訢

聯珠橋記


麥冲小桃源記

借蔭軒記

遊小孤山記

改河橋堤路記

種槐柳記



續修建水縣志

蒙自白謙渠碑記

侍郎包見捷 郡人

去臨郡之百八十里爲邑曰蒙自枕綺蓮灘與日南界蓋重地云
然環郭以外極目灌莽無川澤陂塘之饒田作者仰天雨而舉趾
稍旱則枯槁靡施綆汲亦涸識微之士控摯而談水利計畫無復
之耳萬歷丁未王侯爲政明年政和民乂以其閒召三老楊德宏
等謂之曰吾聞邑東有白謙泉者以林谷蒙翳細民未知其利棄
爲漏流已耳奈何濬鑿之是憚而不以漑瀉鹵爲若導予予往視
之乃郊行二十里援蘿披棘上下原坂得水所從來蓋兩山夾峙
泉流湔湔中有三嶺峻起皆大石廣輪數丈如布壇席者可三里

許侯笑曰是天作之渠也毅然捐俸首倡其事始於戊申春三月集工畫程築爲隄高十餘丈廣二倍深四十餘丈長三倍之鑄鑿三嶺幾什之七功漸就緒費頗浩繁侯始以聞於部使監司請借積穀若干石咸報可更檄助贖銀二十金於是衆心競勸里人楊德宏來以土夷舍補者習知白謙水源通塞處侯聞色喜命賞勸使導果得洞口不二里而近乃乘毀攻堅薙蕪決淤陸省鑿之半澤省堤之半平水穿山腹始涓涓流已而奔騰澎湃如輪甕盎以入轉車轂以出順流而下直達縣郭注之泮海環如輦帶壑闢灌漑田畝無算嗟乎以予觀於天下事所由廢興未始不成於能爲而以逸豫隳也以不腆之邑所綰綬而奏者幾何持籌而議者幾

何乃肘腋之閒而任其地斥鹵也今侯決策一語不搖道謀不動
帑餉斷而行之議不旋踵而一葦之渠成焉自茲雲雨生於畚鍤
金湯隱於隰畛蒙邑巋然增重矣昔鄭渠名以史公楊堰名以召
伯惠澤所存聲稱至今彼循舊跡引鴻澤不愛財力以究厥施雖
心計精亦機勢然也誰與侯之卓識雄斷能以落落難合之議子
來衆庶財不踰千役不踰期夫僅滿萬而建百世永賴之利哉侯
名邈楚京山人

雲龍山記

學士王 奎浙江人

踰州治三十里而遠四山蟠束如輳若蒼虬行天百靈景從蜿蜒
飛舞可愕可愛前出數里林木蓊鬱拔起如畫路人指曰是名石

室中可坐千人又前數十里石巖嵌上而削下有蜂數萬營戶其陽土人利之旁有石洞一罅啓牖土內平經行者夜宿其中足容百人云有虎豹蛇虺患其前石峯十數崒崒雲表隱若城壁松風語天半可望不可卽一逕逶迤側入使有百人守之虎士數萬未可窺也其中皆山箐廣數十弓袤數里兩峯石筍如束草木連蹀雲氣出其間如白練奇形詭勢鬼鑿神局不相連屬如覆盂如巨牖如虎噬如龍翔鳳翥如玉女靚粧勇夫卓旂千變萬狀不可殫紀遙睇其中回峯盤固翠雲相盪琅玕琪樹瑤草文鹿出眇入忽意者必有安期羨門往來其間非人世也不然則山精木客之窟宅殆有神物爲之啓閉世有謝安靈運刊木通道奇祕當不在十

大洞天下日昃絕壑火光青熒疑爲鬼燐策馬疾馳宿小雲龍山下馬牛肩摩尾擊無算兩山萬石林峙雕玉鏤雪白光摩夾甚怪土人鑿山爲峽騎可通南卽大雲龍山從絕頂鳥道斗絕雲霧間蹉跎數里不敢俯睨一峰東轉屹若屏障可數千仞峭峻尤甚騎不得展進寸退尺而大雨如雪氍毹不可禦馬瘖僕痛水聲琅琅山禽鳴岡竹間若爲予言行不得者地主皆土蠻通羅鬼書土毛倍於小雲龍而奇觀不及焉嗟夫昔漢武開西南夷議者以爲勤兵於遠以事不毛之地今觀山川之勝土毛之富侔於中土宜乎王者之無外也

臨安三洞記

學政張佳允銅梁人

臨安古句町國治在滇之巽方勢最下達交廣界價四百里氣蚤
燠初春衣不能袷望皆童阜郡治博大而爽塏西北有水雲萬象
南明三洞者傳奇久矣余友賓巖何君海峯朱君日謀與余往余
先往畢試事遲之乃丁卯花朝也繼得二君書不果來厥明與壁
山盧君出東門北渡瀘江橋逕南營哨煥文諸山從右起連峯競
秀環郡點黛行約兩舍至南明洞洞前亭三楹頽瞰羣峯足供杯
酌與盧君握手步洞門門容二人似卑淺從右小石門俯僂入稍
進四顧甚高敞白石勝玉鍾乳懸注物象瓌瑋巖畔若垂旒狀者
不可殫述爰有天窓接啓不假炬光日射石室萬形可辨與盧君
坐石上各數觥罷至洞底巖高四尋許上露大竅奇樹婆娑舞影

落洞中又南明第一觀也出洞從左登降巖壑可二里至萬象洞
洞口半規懸壁吐簷若廣廈與盧君倚騶奴肩下磴憩其門酌罷
秉炬入百武許垂乳萬狀十倍南明中惟石輪藏特異卽雕刻不
能到傍一小池如芙蕖容水數升余飲之甘清涼侵骨自是從者
各牛飲其中不竭蓋天漿乎稍進一里攀磴上下亂石鈎衣前令
數童子擊石鐘石磬余倚壁聽之聲戛戛繞萬竅此又南明所無
再進一里許多支壑危石橫道深黑難測傳聞此洞杳不可極石
路硤硤蹣蹣甚艱乃出洞陟磴道蹉蹉深沙中命二吏從前後曳
擁始就平遂席地坐與盧君相對張吻作鋸木聲少息復北行折
而東沿山麓行十里道若之玄復下山從西澗沿瀘江入水聲傾

澗澎最雷轉約二里至水雲洞洞舊名巖洞殊蕭索不稱余易今
名云洞門峻啓霞壁刺天石堂窅窔顯敞寡匹垂乳如林難以辭
叙少進則飛龕丹盤標舉秀發曲折其中如遵兩掖其石扉高雄
吞束長津上垂石簾數丈若有天帝端居清虛之表令人正襟而
立再進則秉炬望一竇迺江水奔流處不可逕矣余顧盧君謂茲
洞明豁閎傑勝萬象南明遠甚致足樂也將理策返左右曰此前
門若觀中洞更奇余與盧君撫掌曰有是哉遂由北行山徑羊腸
舍輿而步可三里至中洞甫至洞口見飛巖截雲似墜復倚一石
柱從右撐挂甚奇與盧君列席坐沙上仰對蒼壁下臨江水蓋瀘
江從前門入者伏流至此素湍綠潭迴清倒影特可稱心時指揮